

Uunga siunnersuut: Utoqqaat illersuisuat pillugu Inatsisartut inatsisaat nr. xx, xx. xxx 2019-imeersoq

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Saqqummiussissut

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Siullermeerneqarnera

Utoqqaat illersuisuat pillugu Inatsisartut inatsisissaattut siunnersuut saqqummiutissallugu Naalakkersuisut nuannaarutigivaat.

Naalakkersuisut utoqqaat pillugit politikimik suliaqarnerinut atatillugu aamma utoqqaat illersuisuannik pilersitsisoqarnissaa isigineqassaaq. Naalakkersuisooqatigiinnissamik isumaqatigiissut malillugu, tassanilu siunertat piviusunngortinniarlugit utoqqarnut suliassaqarfimmi politikimik ataatsimoortumik suliaqartoqassasoq Naalakkersuisut kissaatigaat, matumani utoqqarnut suliassaqarfimmi unammilligassat tamakkiisumik ersersinneqassallutik.

Maannamut Meeqqat Illersuisuat aamma Innarluutillit Illersuisuat pilersinneqarnikuupput. Illersuisoqarfittut aaqqissuussat taakku marluk Naalagaaffiit peqatigiit Meeqqat aammalu inuit innarluutillit pisinnaatitaaffii pillugit isumaqatigiissutaannik aallaaveqarput. Illersuisoqarfittut aaqqissuussat taakku marluk isumassarsiorfiusimapput, kisianni Utoqqaat illersuisuannik pilersitsinissamut siunnersuut Naalagaaffiit Peqatigiit isumaqatigiissutaannik aallaaveqanngilaq.

Siunnersuutikkut Utoqqaat Illersuisuannut atugassarititaasunik pilersitsinissaq siunertarineqarpoq, taanna inuiaqatigiinni utoqqaat soqutigisaannik siuarsaasinnaavoq kiisalu inuiaqatigiinni utoqqarnut atugassarititaasut pillugit paasisitsiniutigineqarnissaannik qitiutitsilluni. Suliamut tassunga atatillugu Utoqqaat illersuisuata utoqqaat atugarisaat pillugit ilisimalikkat politikinerinut, oqartussanut, kattuffinnut innuttaasunullu ingerlateqqittassavai.

Utoqqaat illersuisuannik politikikkut attuumassuteqanngitsumik erseqqissumik pisinnaatitaaffilerneqartumik siamasissumillu ilisimasaqartumik pilersitsinissaq siunertaavoq.

Utoqqaat illersuisuat utoqqaat inuuniarnerminni atugaat pillugit utoqqarnut tamanut illersuisuussaaq. Utoqqaat illersuisuata suliaanut utoqqaat sapinngisamik peqataatinneqassapput.

Utoqqaat illersuisuat utoqqarnut atugassarititaasut pillugit utoqqarnut allanullu soqutiginnittunut siunnersuillunilu ilitersuussisinnaavoq. Utoqqaat illersuisuat utoqqarnut atugassarititaasut patajaallisarneqarnissaannut suliniutinik nutaanik

siunnersuuteqarsinnaavoq. Utoqqaat illersuisuata aalajangersimasumik tusarniaaffigineqartartutut utoqqaat atugarisaat pillugit inatsisiliornerit, qulaajaanit pilersaaruserillu nammineerluni nalilersorlugillu oqaaseqarfigisinnava. Utoqqaat atugarliortut Utoqqaat illersuisuata immikkut isiginiartussaavai.

Suliassaqarfiit ilaanni ilanngutsitsisarnermik aalajangeeqataasarnissamillu qulakkeerinnineq immikkut ittumik amigaatigineqarput. Tamakku malitsigisaannik Utoqqaat illersuisuata suliassaqarfiit utoqqaat atugaanni ajornakusoorfiusut suussusersissavai, taakkulu politikerinut, oqartussaasunut innuttaasunullu ingerlateqqillugit.

Utoqqaat Illersuisuat utoqqaat inuuniarnerminni atugaat pillugit atuuffimmigut utoqqaat pisariinnerusumik pitsaasumillu siunnersorneqarlutillu ilitsersorneqarnissaannik qulakkeerinnissaaq.

Utoqqaat illersuisuat nammineerluni imaluunniit saaffigineqarnerup kinguneranik iliuseqarsinnaavoq. Kikkut tamarmik Utoqqaat illersuisuannut saaffiginnissinnaatitaapput. Utoqqaat salliutinneqassapput.

Taamatut oqaaseqarlunga siunnersuut matumuuna Inatsisartunut akuersaartumik suliarineqartussangorlugu tunniuppara.